

## POSLANIČKA PITANJA

### SA 35. SJEDNICE SKUPSTINE USK-A ODRZANA 23. 04.2013. GODINE

Elvira Abdic Jelenovic:

Za danas imam jedno izaslaničko pitanje i jednu požurnicu. Moje pitanje je u skladu sa Poslovníkom o radu Skupštine i upućujem ministarstvu pravosuđa USK-a, ministarstvu finansija i upravi za indirektno oporezivanje. ŠPD Unsko-sanske šume doo Bosanska Krupa je u više navrata a potom i Skupština svojim Zaključkom broj 01/1-320-1/05 zatražila od Vlade USK da preispita zakonitost Odluke kojom ovo poduzeće izdvaja dio svojih prihoda u Fond za izgradnju stanova za članove porodica šehida i poginulih boraca, RVI, demobilisane borce i prognane osobe. U periodu od 2000- do 2010. Samo iz ovog poduzeća je izdvojeno 3.429,057 tisuća maraka. Pored prihoda iz ovog poduzeća u fond se godinama izdvajaju sredstva po osnovu naknade i doprinosa iz naknada u visini od 10%. Odluka na kojoj se temelji naplaćivanje iznosa od 10% primanja izabranih dužnosnika na svim nivoima vlasti općinskih i kantonalnih nametnuta je kao zakonska obaveza. Obzirom da sam nekoliko puta tokom prošlog mandata postavljala pitanje vezano uz zakonitost ove odluke i nisam dobila adekvatan odgovor, postavljam sljedeće pitanje: da li ja navedena odluka u skladu sa postojećim zakonskim propisima, da li se provođenjem navedene odluke krši zakon o doprinosima, u kojem broju Službenog lista USK-a je objavljena navedena odluka, koliko je ukupno uplaćeno sredstava u Fond po osnovu plaća i naknada od dana donošenja odluke do danas i da li su uplate evidentirane za svaku općinu posebno.

Požurnicu ulažem na pitanje koje sam postavila na sjednici 18.12.2012.godine. U skladu sa Poslovníkom o radu Skupštine uputila sam ga Vladi a tiče se da na podružnici za oglašavanje duž magistralne ceste na kantonu redovito se ističu prigode, čestitke upućene građanima od kako stoji premijera USK Hamdije Lipovače. Kako je na čestitkama naznačeno samo jedno lice stiže se dojam da su reklamni plakati promidžba funkcije premijera a ne Vlade USK čime se ostavlja prostor svakom ministru da u svoje ime upućuje iste čestitke što se u proteklom periodu i događalo. Pitanje sam postavila- koliko se iz budžeta USK u periodu od 01.01.2011.godine do danas izdvojilo sredstava za izradu reklamnih plakata, njihovu ugradbu i naknadu za korištenje panoa. Koliko je sredstava iz budžeta kantona u istom periodu izdvojilo za reklame na tv-u u pisanim i elektronskim medijima. Zašto u potpisu prigodnih čestitki umjesto premijera Hamdije Lipovače ne stoji Vlada USK.

Farko Hodžić:

Poštovani, ja sam zamoljen od grupe ljudi koji su imali ugovor sa vladom odnosno sa ministarstvom poljoprivrede- ugovor o djelu prilikom nabavljanja junica. Tu se radi o doktoru Nerminu ??, doktoru veterine Jasmin Prnjak i doktor Zlatko Jusufagić. Oni su me zamolili da postavim poslaničko pitanje jer su iscrpili sve druge mogućnosti da bi naplatili svoj rad, a to traje već godinu dana. Oni su se obraćali na sve moguće adrese i ne bi ljudi ni reagovali da svi drugi koji su učestvovali u tom projektu su naplatili svoje jedino oni nisu a imaju uredno potpisan ugovor o djelu što ću ja u prilogu dati. Da ne bih obrazlagao puno, ljudi su išli u Češku, Njemačku i Austriju o svom trošku i nisu naplatili ono što ih sleduje iako su imali sve definisano ugovorom o djelu. Moje pitanje glasi- kada će ovi ljudi naplatiti svoja potraživanja jer ovo traje preko jedne godine.

Husein Rošić:

Ja ću u skladu sa poslovníkom postaviti dva poslanička pitanja. Pitanja su upućena sekretaru vlade odnosno premijeru kantona. Prvo pitanje tiče se Odluke Vlade USK od 14.02.2013. godine gdje, kako je ovdje naznačeno u Službenom glasniku, poziva se na Zakon o vladi i Zakon o izvršenju budžeta, odgovorno tvrdim da ova odluka nema nikakve veze sa ovim normativnim aktima iz jednog prostog razloga što regulira radno pravni odnos ministara u Vladi USK-a i državnih službenika. S toga moje pitanje glasi na osnovu kojeg zakonskog propisa je vlada uSK odnosno predlagač ministarstvo finansija uputilo u proceduru ovakvu jednu odluku koja dakle sigurno je u kontradiktornosti sa ovim normama koje ste vi naveli u preamboli a tiče se kako bi bilo jasnije prije svega javnosti, ja ću navest samo tačku 7- izabrani dužnosnici i nosioci izvršnih funkcija sa izuzetkom osoba koji ne ostvaruju plaću na osnovu poslaničke dužnosti ukoliko borave izvan mjesta prebivališta svoje porodice koje je udaljeno više od 70 km od sjedišta institucije u kojoj su zaposleni imaju pravo na naknadu za odvojeni život. Dakle kako znate, mi smo na jednoj od prošlih sjednica usvojili Nacrt Zakona o plaćama organa vlasti i taj zakon još nije došao u formi prijedloga, odnosno nije usvojen i on u biti regulira ovu oblast kada je u pitanju odlazak ljudi izvršne vlasti u penziju ili u slučaju određenih da kažem u slučaju smrti ili nekih drugih aktivnosti, a ne u slučaju ove preambole.

Moje drugo poslaničko pitanje tiče se prije svega granta neprofitnim organizacijama. S toga ja postavljam pitanje sekretaru vlade. Na osnovu koje odluke, zaključka ili uredbe vlade USK-a sa lokacije grant neprofitnim organizacijama se isplaćuju jednokratne pomoći odnosno premijer Lipovača isplaćuje jednokratne pomoći fizičkim licima. Dakle kao što znate rezerva premijera je 300.000 km, otprilike ona je u zakonu o izvršenju budžeta i normama koje reguliraju tu oblast precizirana za šta se koristi, ali koristit grant neprofitnim organizacijama za ovakve namjene mislim da je prije svega neozbiljno. Zašto postavljam ovo poslaničko pitanje. Iz jednog prostog razloga zato što mi se obratila osoba koja nije željela da iznesem njeno ime jer radi se o osobi koja je oboljela od malignog oboljenja, koja je na osnovu zahtjeva dobija rješenje da se sa ovog granta uplati 200 km, a na osnovu dokumentacije koju sam ja dobio nekim ljudima koji su u rodbinskim vezama sa premijerom isplaćuje se po 3000 km. Tražim da se zastupnicima za narednu sjednicu pripremi na osnovu koje odluke, da se tačno, s obzirom da postoji 300 zahtjeva koji su odobreni, tačno prema imenima fizičkih lica kojima su odobreni iznosi navede taksativno kako bi zastupnici mogli se upoznati sa ovim.

Sead Kadić:

Ja imam dva poslanička pitanja. Prvo moje pitanje i inicijativa se odnosi na otvaranje i početak rada rudnika gipsa u Orašcu i Kulen Vakufu. Ja se nadam da svojim kolegama nisam dosadan sa ovim pitanjima i nadam se da nisam ni ministarstvu dosadan ali imam obavezu jer sam 2006.godine još u prvom mandatu govorio da ću svaki put, na svakoj skupštini govoriti o ovome dok se to pitanje ne riješi. Dobre namjere ranijih ministarstava i vlade nisu upitne, a moje inicijative i pitanje imaju za cilj da se ne odustane od ovog projekta. Šta se je sve dešavalo proteklih sedam godina nije za pohvaliti ali se može konstatirati da sa ovakvim koracima, ovakvom inertnošću i ovakvim spletom pravnih zavrzlama zadugo nećemo moći ništa značajnije uraditi u ovoj oblasti pa mogu slobodno reći i u drugim oblastima koje zahtjevaju sve ove procedure. Stvarno stanje po pitanju ovog nalazišta gipsa izgleda ovako- na moje postavljeno pitanje 18.12.2012.godine o statusu ovog projekta uz poznate činjenice o aktivnostima francuske firme Lafarž o ispitivanju nalazišta, dokazivanju rezervi kvaliteta i po riječima direktora Mahmutović Esada uloženih oko 1,5 miliona maraka, odgovor ministarstva je da firma Lafarž trba izvršiti identifikaciju zemljišta, dobiti šumarsku saglasnost za krčenje zemljišta što bi navodno bilo dovoljno da se podnese zahtjev za koncesiju. Dalje, ministarstvo je uputilo 08.01.2013.godine općini Bihać dopis gdje traži utvrđivanje katastarskih čestica. Općina Bihać je 30.01.2013.godine odgovorila da je ova priča nemoguća dok se ne donese novi zakon o izmjeni i katastru nekretnina. Krug nemoći se sa ovim papirom i odgovorom završava. Postavljam sljedeće pitanje- ko treba promijeniti ovaj zakon i koliko sve to treba trajati. Zašto se ne može dati koncesija Lafaržu pod uslovom da pribave ostale papire bar za prostor od 7,87 hektara koji su kako sam ja shvatio kupili. Zašto Skupština ne izglasa i ne bude jedinstvena u donošenju ovakvih odluka i stane iza njih jer su sigurno takve odluke u korist građana kantona. Predlažem da se formira skupštinska komisija iz sastava svih političkih stranaka, da se obiđe teren i lokacija rudnika sa ministarstvom privrede, energetike i rudarstva, da se komisija upozna sa ovim projektom i nakon toga predloži ovom domu konačno rješenje ovog problema.

Moje drugo pitanje se odnosi na održavanje pojedinih cesta i dionica cesta u općini Bihać. Postavljam ga ministarstvu energetike, privrede i rudarstva, federalnoj direkciji za ceste i kantonalnoj direkciji za ceste te zavodu za prostorno uređenje grada Bihaća. U nekoliko navrata kantonalna televizija koja je već odavno prepoznata kao televizija kojom upravlja premijer Lipovača je zlonamjerno izvještavala o udarnim rupama u dijelovima grada Bihaća ne ulazeći uopšte u to čija je nadležnost održavanje uslikanih udarnih rupa. Radi pravilnog informiranja javnosti molim nadležne da mi odgovore na sljedeće pitanje- u čijoj su nadležnosti za održavanje sljedeće ulice u gradu Bihaću- cesta od Izačića graničnog prelaza do mosta Mušanovića, ulica Dr. Irfana Ljubijankića preko Bedema aleje i mosta Alije Izetbegovića do skretanja na put Armije BiH prema Bosanskom Petrovcu, cesta od mosta Alije Izetbegovića preko trga Maršala Tita do Mušanovića mosta, cesta od pošte do Žegara i dalje do zadnjih hrvatskih naselja, cesta od Kamenice do Gate i dalje prema Cazinu, cesta od autobusne stanice u Bihaću kroz Bihaćkih branilaca, Kasima Čehajića, Jablanska i dalje prema Cazinu i Bosanskoj Krupi. Općina Bihać je reagirala i na svoju odgovornost pokrpalala udarne rupe ali će biti interesantno kad se dobiju odgovori od gore pobrojanih državnih institucija čija je nadležnost za održavanje ovih cesta.

Damir Hodžić:

Moje prvo pitanje ponukano je dnevnikom Hamdije Lipovača a objavljen 06.04.2013.godine u jednom dnevnom listu u kojem je izneseno niz nebuloza, neistina i uvreda. Umjesto da ponudi građanima rješenje za izlazak iz krize za nagomilane probleme, Hamdija Lipovača vokabularom kojim se on najbolje služi etiketira pojedince pa ih naziva Gebelsom, kapetanom kukasti nos, gusarima, parazitima, nesposobnjakovićima itd. Između ostalih u svom je dnevniku Hamdija Lipovača u svom stilu napao i akademsku zajednicu te je spomenuo i moje ime kao radnika univerziteta u Bihaću u kontekstu trošenja sredstava za putne troškove. Ja moram premijeru kazati da ja kao uposlenik univerziteta u Bihaću, te kao nacionalna kontakt osoba preko ministarstva civilnih poslova BiH za projekte Evropske unije već godinama zajedno sa kolegama sa Tehničkog fakulteta i Univerziteta u Bihaću pišem i sudjelujem u domaćim i međunarodnim istraživačkim projektima. Kao voditelj ureda za projekte i međunarodnu saradnju na tehničkom fakultetu u Bihaću zajedno sa drugim kolegama osigurali smo u 2012 i 2013.godini učešće univerziteta u Bihaću u tri međunarodna projekta od čega su dva financirana od tempus programa Evropske unije i jedan je financiran od strane švicarske vlade za razvoj visokog obrazovanja te jedan nacionalni projekat finansiran od fonda za zaštitu okoliša federacije BiH. Sredstva koja su osigurana univerzitetu u Bihaću i USK su 420.000 km. I to nisu planirana budžetska sredstva a raspoređuju se na nabavku laboratorijske opreme, organizovanje stručnih i naučnih seminara, učestvovanje naših studenata na studentskim konferencijama, štampanje publikacija te jedan manji dio i na putne troškove koje je gospodin Lipovača spominjao u svom dnevniku. Moje pitanje je rektoru univerziteta u Bihaću. Koliko je hamdija Lipovača kao akademski građanin i docent napisao naučnih i stručnih radova. Na koliko je naučno-istraživačkih i stručnih projekata učestvovao u svom akademskom napredovanju i koliko je ukupan doprinos dao razvoju univerziteta u Bihaću kao docent doktor, načelnik i premijer i da li je premijer sa svoje pozicije uticao na izbor hotela Emporijum kao najbolje ponude za smještaj profesora spoljnih saradnika univerziteta u Bihaću.

Moje drugo pitanje je ministarstvu finansija. Kojeg dana u mjesecu će se isplaćivati plaća budžetskim korisnicima. Naime, mi smo na prošloj sjednici skupštine donijeli odluku o kratkoročnom kreditnom zaduženju overdraft i tada je savjetnik za finansije gospodin beganović rekao da će plate biti izmedju petnaestog i sedamnestog u mjesecu. Danas je 23. a plata još nije isplaćena.

Mirvet Beganović:

Ja danas imam dva pitanja. Obadva su upućena premijeru Lipovači. Moje prvo pitanje- kada će gospodin Lipovača u skladu sa članom 187 redovno prisustvovati sjednici ove skupštine a to govorim iz sljedećeg razloga. Davao je izjavu za jedan medij gdje je ocjenio moj rad kao nekonstruktivan. Ja bih molio kolege ministre koji prisustvuju redovno sjednicama da mu prenesu i daju ocjene moga rada vezano za materijale i ono što je tema ove sjednice. Stvarno na jedan način i sa aspekta da mi imamo jednu koaliciju i da smo opozicija sa SDA nema nikakvih, glasam po svojoj savjesti i po stavu svoga kluba koji funkcioniše na način kako funkcioniše. Prema tome ocjene o nekonstruktivnosti, ja kada bih slušao svoje rukovodstvo stranke koje je prije govorilo da kao opozicija nemam nikakve obaveze prema gospodinu Lipovači da ga kritikujem, nisam to nikad poštivao jer moj stav je takav da moje diskusije idu samo vezano za materijale i za konstruktivnu diskusiju. Da je prisutan ovim sjednicama kao što je kolega u susjednoj državi gospodin Milanović, pa daje odgovore onda bi puno drugačija situacija bila, ne bi ovakvih pitanja puno bilo jer bi mogao direktno u lice da ljudima odgovori.

Moje drugo pitanje je takođe Hamdiji Lipovači. U kojoj je fazi i dokle se stiglo sa najavljenim projektima razvoja USK, kargo aerodrom, plinovod, brza cesta, agrokomerc i druge firme koje su ovdje u privatizaciji. Moje pitanje je iz razloga kada se nastupa u medijima priča se o agrokomercu, priče o nekim velikim projektima međutim ništa konkretno. A ovaj kanton sve dublje tone u krizu pa gospodine premijeru ako ste već najavljivali onda sa riječi pređite na djela.

Kasim Mulalić:

Ja imam dva poslanička pitanja. Oba su prema direkciji za ceste. Prvo pitanje kad će se zakrpati udarne rupe na regionalnoj cesti 41 B Gnjilavac- Bužim i kome se vlasnici automobila mogu javiti za naknadu štete. Drugo pitanje- kad će se realizirati investicija planirana za 2011 odnosno 2012.godinu presvlačenje regionalne ceste prolaz kroz Bužim i izgradnja trotoara. Poznato vam je svima da je Bužim grad sa najviše djece na cesti, da je Bužim grad sa najmanje trotoara. Investiciju čekamo dvije godine i pozivam televiziju USK koja sebe naziva televizijom USK da dođe u Bužim jer Bužim je grad USK, u špici prilikom promjene u školama da vide i snime koliko djece imamo na cesti. Pozivam takođe da i udarne rupe koje snimaju po Bihaću snime na regionalnoj cesti gnjilavac- Bužim i prolaz kroz Bužim. Ponavljam ponovo Bužim je grad USK i da uputi građane kome treba da se jave da namire štetu koju svakodnevno trpe na svojim vozilima putovanjem Bužim-Bihać i dalje.

Nijaz Hušić:

Ja za danas isto tako imam dva poslanička pitanja. Prije svega želim reći da kao izabrani predstavnik da tako kažem građana u ovoj Skupštini kao i sve moje kolege moram ponovo izraziti nezadovoljstvo nedobijanjem odgovora na poslanička pitanja. Ja vjerujem da sve kolege pa tako i ja ova pitanja dobijem direktno najčešće od samih građana, međutim danas na ovoj sjednici nismo dobili odgovore niti na jedno poslaničko pitanje sa proteklih sjednica što govori o neozbiljnosti onih koji trebaju dati prije svega odgovore na ova pitanja ne nama lično nego građanima koji preko nas izabranih zvaničnika žele određene odgovore dobiti.

Moja dva pitanja upućena su ministrici financija koja je na sreću ovdje danas. Prvo pitanje odnosi se na isplatu troškova za prijevoz budžetskih korisnika. Po mojim informacijama ta sredstva zavisno od ministarstva do ministarstva nisu isplaćivana od septembra mjeseca i zato moje pitanje glasi za koliko mjeseci nisu isplaćeni putni troškovi budžetskim korisnicima, a ono što posebno i kada će biti isplaćena, a ono što posebno želim naglasiti da su u najtežoj situaciji prosvjetni radnici i zaposlenici u MUP-u koji zasigurno prevaljuju najduži put do do posla i koji upravo zbog neisplaćivanja tih putnih troškova u posljednje vrijeme kao razlog bolovanja upravo uzimaju zbog nemogućnosti odlaska na posao. To je jedna vrlo nezavidna situacija u kojoj su se našli, posebno govorim prosvjetari i uposlenici MUP-a.

Moje drugo pitanje odnosi se na Osnovnu školu Ćoralici. To je jedina škola koja nije primila regres, jedini budžetski korisnici koji nisu primili regres na našem kantonu. Da sad ne navodim razloge ko je kriv za to, da li je to menadžment kriv ili neko u ministarstvu ko nije vidio da ti ljudi nisu planirali taj regres. Njima je obećano da će rebalansom i njima je obećano da će biti rebalans do kraja marta. Ljudi su čekali taj rebalans, nije ga bilo. Moje pitanje glasi da li će onako kako je to najavljeno i kako predstavnici sindikata u toj školi govore da li će regres tim uposlenicima biti isplaćen iz rezerve premijera koji bi onda kasnije mogao vjerovatno kroz neki budući rebalans ta sredstva tim uposlenicima na neki način namiriti.

Ismet Dolić:

Ja imam dva zastupnička pitanja i moje je pitanje za kantonalnu direkciju za ceste. Gospodin Mulalić je išao do Bužima, ja ću nastaviti cestom koja vodi od Bužima, Vrnograča do Velike Kladuše odnosno od Velike Kladuše pa sve ovdje do Gate. Zaista do Gate do onog dijela teritorija koja je ta neka granica između općina su sanirane sve rupe no međutim od Gate pa do Kladuše te rupe nisu sanirane. Interesira me što namjerava uraditi ta kantonalna direkcija za ceste odnosno ovim putem ja pozivam da što prije iziđe na teren da snimi situaciju i da krene u akciju jer je proljeće, povećan je broj prometa, ove ceste su najfrekventnije i ja vjerujem da je ova cesta iz Bužima do Kladuše možda najfrekventnija cesta u BiH. Naravno radi se o velikim štetama i o velikim problemima a uzrok je u tome zbog ranije nekvalitene sanacije. Pa prema tome kantonalna direkcija za ceste u akciju.

Moje drugo zastupničko pitanje ono je više inicijativa. Znači pokrećem inicijativu za osnivanje kantonalnog fonda a koji bi prikupljao novčana sredstva koja bi bila korištena za pomoć u liječenju djece sa kantona koja su oboljela od malignih oboljenja. Nime USK po onome što sam ja čuo ima najveći broj oboljele djece od malignih bolesti i drugih sličnih oboljenja koja se ne mogu liječiti u BiH. Ova liječenja su veoma skupa i njihovo liječenje ne može plaćati ZZO kao što ne može ni onaj fond solidarnosti na nivou federacije. Roditelji i obitelj nisu u stanju da plate ovo liječenje. Znači ova problematika nije nova, ona traje već poslije rata i mislim da bi smo mi kao ljudi i kao političari trebali biti odgovorni i pronaći jedan modus kako pomoći ovoj kategoriji i nedaj bože bilo kome da se desi. Ja u ovoj inicijativi samo sugeriram kao što se to radi i obično negdje da se novčana sredstva u prikupljanju za ovaj fond uzmu od uposlenika po nekom ključu, oni koji imaju mala primanja po marku, oni koji imaju više, da se uzima od onih koji registriju automobile, da se može izraditi jedan marketinški pristup da se daju donacije, u svakom slučaju ovaj fond je nama potreban jer svi vidimo i na cesti i u medijima i na kraju krajeva evo pričamo i o ovoj proračunskoj rezervi koju koristi ministar i drugi da izdvajaju uvijek ta sredstva.

Mira Ljubijankić:

Postavljam sljedeće poslaničko pitanje, Izvještajem o reviziji finansijskog izvještaja budžeta USK-a za 2010.godinu tačka 4 u poglavlju kratkoročna potraživanja i plasmani utvrđeno je da su kratkoročna potraživanja i plasmani na dan 31.12.2010.godine iskazana u iznosu od 8.686,873 km i u odnosu na iste od 01.01.2010. godine kada su iznosili 16.178,457 km manji za 7.491,584 km. Smanjenje potraživanja je nastalo kao posljedica donošenja odluka o otpisu istih iz glavne knjige. Ministarstvo finansija je izvršilo isknjižavanje 2. 121,699 km potraživanja. 882.321 km potraživanja je isknjiženo iz bilansne evidencije i proknjiženo u vanbilansnu evidenciju dok je isknjiženo potraživanje vanbilansne evidencije u iznosu od 14.650.393 km. Ministarstvo poljoprivrede, vodoprivrede i šumarstva je otpisalo kratkoročna potraživanja u iznosu od 1. 251, 766 km i kratkoročne plasmane u iznosu od 361,225 km uz obrazloženje da je nastupila zastara. Ministarstvo obrazovanja, nauke, kulture i sporta je otpisalo potraživanja u iznosu od 315.808 km u obrazloženju da je nastupila zastara. MUP je otpisao potraživanja u iznosu od 307,058 km uz obrazloženje da je nastupila zastara. Ministarstvo za građenje je isknjižilo potraživanje u iznosu od 80.714 km uz obrazloženje da je nastupila zastara. Obzirom da je kod svih budžetskih korisnika obrazloženje za otpis potraživanja i plasmana bila činjenica da je nastupila zastara nameće se zaključak da isti nisu pratili dospelost potraživanja niti su poduzimali zakonom propisane radnje za naplatu istih, odnosno spriječili nastanak zastare potraživanja s čime je nastupila milionska šteta po budžetu USK-a. Nakon svega navedenog upućujem sljedeća pitanja i zahtjeve vlade USK-a nadležnim ministarstvima i pravobranilaštvu USK. Ko su odgovorne institucije i osobe radi čijeg je

nečinjenja došlo do nastanka milionske štete po budžet USK-a. Da li su protiv odgovornih lica pokrenuti postupci utvrđivanja odgovornosti. Zahtjevam da mi svako ministarstvo posebno dostavi pregled sa popisom i tačnim podacima dužnika kojima su otpisana potraživanja. Zahtjevam da svako ministarstvo posebno dostavi pregled sa popisom i tačnim podacima dužnika prema kojima USK ima kratkoročna a nenaplaćena potraživanja i plasmane starije od 6 mjeseci i zahtjevam da mi ministarstvo finansija USK-a dostavi obrazloženje sa jasno naznačenim razlozima isknjižavanja potraživanja vanbilansne evidencije od 14.650,393 km.

Asim Kamber:

Gospodine predsjedavajući ja imam ovdje set pitanja koja sam postavio. Ukupno sam postavio u ovom periodu 11 pitanja i na 2 sam dobio odgovor i ta 2 su sa višeg nivoa. I ovdje su ova pitanja i molio bih nadležne kome sam postavljao pitanja, drago mi je što je ovdje veći broj predstavnika vlade, molio bih kako ne bih bio u poziciji dda podnesem prijavu dakle zbog činjenice da se krši zakon o pravu na informaciju, čini mi se član 4. Kad je riječ o današnjem pitanju želim se zahvaliti, meni neka ministarstva dostave i traže da to bude inkognito. Ja se i za to želim zahvaliti. Da ne smiju to javno slati. Međutim, ja hoću da dođe i ovdje odgovor da i moje kolege vide ono što sam ja dobio. Mene je obradovala činjenica, kad sam vidio kratko premijera ja sam mislio da će on ostati ali iz određenih razloga je otišao, ne znam sa kojim obrazloženjem ali bi bilo korektno barem u periodu ovih poslaničkih pitanja, a vjerujem da on ima relevantne, korektno odnose i ne bi onda imali ovih nesuglasica. Ne bi imali daljnih upita.

Moje se prvo pitanje odnosi na korištenje operatera. Naime, općina Sanski Most za 24 fiksna telefonska priključka, 10 mobilnih, 10 internet priključaka za mjesec mart je platila 3.040 km. Vlada USK, odnosno kabinet na čijem je čelu gospodin Lipovača potrošila je samo na račun jednog operatera M-tela preko 12.000 km. Dakle četiri puta više. Koliko je vlada USK-a potrošila za sve operatere mobilne, fiksne mreže te internet priključke u martu ove godine. Dakle ja tražim tu informaciju zato što imam nezvaničnu informaciju, ja sam pitao kolegu Rošića šta je to Hot line, imam informaciju da naš kanton u tome prednjači u korištenju te linije. I trebamo vidjeti da ne bi sutra neko drugi o tome govorio, da mi previniramo da se ove linije, da se barem malo umanje.

Drugo pitanje, javnost je o premijeru iz vremena načelnikovanja Bihaćem stekla sliku suptilnog darivatelja državnih para. O sebi on je uvijek imao mišljenje kako je njegova grandiozna figura humaniste prešla kantonalne, entitetske pa i državne granice. Nije nikakva tajna da budžet doživljava kao vlastiti posjed. Praktično je s njim intiman. Neću i ne želim povjerovati da su njegovi budžetski milodari rezultat namjere vlastitog promoviranja. Međutim, čekove koje je poklanjao mene lično podsjećaju na one panoe sa obavjestima o sletovskim majskim manifestacijama. Iz svemira se u BiH jedino zapaža ovaj toranj i ovi njegovi čekovi. Njegov humanistički imidž prešao je okvire naše planete. Medijski agenti Safet i Nermina to su uredno medijski pratili. Međutim, ja imam informaciju da nažalost nisu svi plaćeni pa bih vas molio da preostale donacije koje ste putem ovih čekova obećali isplatiti gospodine premijeru platite, a meni dostavite izvještaj o sve do sada uplaćenim u općini Bihać i Vladi USK-a.

Ivan Prša:

Upućujem pitanje Komisiji za koncesije USK-a i ministarstvu poljoprivrede, vodoprivrede i šumarstva USK-a. Tko su obaveznici plaćanja koncesionih naknada u ime korišćenja prirodnih bogatstava, javnih dobara po osnovu korištenja voda na području USK-a. Da li postoji evidencija potraživanja po osnovu zaključenih ugovora o koncesijama i ukoliko

postoji zahtjevam da mi se dostavi pregled korisnika koncesionih dobara sa navedenim koncesionim naknadama i da li su ispostavljene fakture korisnicima koncesija u rokovima definisanim u ugovorima te da li je izvršena naplata po tom osnovu te da li su prema korisnicima koncesionog dobra eventualno poduzimane zakonom utvrđene aktivnosti i mjere kako bi se izvršila naplata dospjelih potraživanja i zaštito javni interes. Tražim da mi Komisija za koncesije USK i Ministarstvo poljoprivrede, vodoprivrede i šumarstva dostavi pregled sa popisom i tačnim podacima dužnika po osnovu koncesionih naknada prema kojim postoje potraživanja starija od šest mjeseci.

Muhamed Dervić:

Oba pitanja su ministarstvu obrazovanja. Prvo glasi, a vezano za Univerzitet u Bihaću. Koliko je u 2012 i 2013. Godini obračunato sati preko norme po organizacionim jedinicama Univerziteta u Bihaću te zahtjevam tačan pregled s brojem sati i iznosima po svakom uposleniku koji je ostvario prihod po ovom osnovu. Koliko je u 2012 i 2013. godini isplaćeno putnih troškova za službena putovanja i pregled po svakom zaposleniku. Zahtjevam i tačan pregled svih ostalih isplata koje su izvršene prema zaposlenicima u organizacionim jedinicama Univerziteta u 2012 i 2013. godini po drugim osnovama a koje se ne odnose na isplate redovne plaće i naknade za topli obrok.

Ja sam dobio čitav akt jedan po pitanju otkaza uposlenice Mirele Kljajić Dervić. Ja vas zamoljavam da vidite sa rektorom ko je potpisao taj otkaz i te stvari da se privedu u skladu sa zakonskim propisima.

Jusuf Bajrektarević:

Prvo pitanje je kantonalnoj civilnoj zaštiti i nadležnim institucijama. S obzirom da je u prethodno vrijeme bile obilne snježne padavine i kišne padavine puno vode se izlilo i na takav način dovelo do šteta i dovešće do kašnjenja u poljoprivredi i poljoprivrednim usjevima, ja tražim od nadležnih institucija da se u ovom segmentu poljoprivreda pomogne jer će vjerovatno i umanjiti prihode zbog nemogućnosti na vrijeme sjetve. Također ove obilne kiše su izazvale silna klizišta na putevima. Te puteve koriste poljoprivrednici za prevoz svojih poljoprivrednih dobara i takvih puteva je na USK puno koje treba kantonalna civilna zaštita iz namjenskih sredstava sanirati i druge nadležne institucije. Navešću samo nekoliko primjera klizišta gdje građani gotovo ne mogu ni proći tim putevima a to je u Šturliću, Šturlička Platnica, Džehveri, Kudići, Šumatac. Ima čak ugroženih i kuća u šturličkoj Platnici. Drugo pitanje premijeru USK-a i predsjedavajućem skupštine. Naime, obradovalo me kad sam na mediju vidio da je na našem kantonu u posjeti bila ekspertna grupa za izmjenu Ustava i da su tu našu grupu primili premijer i predsjedavajući. Ja kao zastupnik i kao građanin molim da nas na narednoj sjednici jednom informacijom obavijeste, ustvari da predsjedavajući to stavi kao tačku dnevnog reda, da mi vidimo gdje smo mi tu u ustavnim promjenama, da damo doprinos da i naš ustav, da bi ustavne promjene dovele do bolje organizacije, jednostavnije, jeftinije organizacije države, bolje poštivanje ljudskih prava i sloboda i bolji uvjeti za investicije za otvaranje novih radnih mjesta i novo zapošljavanje.

Esad Bašagić:

Nastavlja se ovo moje prvo poslaničko pitanje na ona koja su ranije moje kolege postavljali a radi se o sanaciji rupa na magistralnom putu Cazin- Stijena- Bosanska Krupa. Naime, građani



pitaju da li će doći do sanacije istog puta jer je on u vrlo lošem stanju i da li će se nastaviti radovi na nastavku projekta trotoara prema Stijeni.

Drugo pitanje, kako su učestala oštećenja na službenim vozilima organa uprave i vlade USK-a postavljam pitanje odgovornosti za materijalnu štetu na službenim vozilima i postavljam pitanje kakva je uloga policije u navedenoj situaciji. Ovo drugo pitanje je ministru policije koji sjedi u prvom redu a prvo pitanje direkciji cesta.

Nermin Bećirbegović:

Ja za danas nemam poslaničko pitanje ali imam inicijativu. Iskoristiću ovaj poslanički sat da pokrenem inicijativu prema ministarstvu zdravstva da se prema uzoru na rješavanje problema nagomilanih iz proteklog perioda Kantonalne bolnice dr. Irfan Ljubijankić pokuša iznaći modus za rješenje problema opće bolnice u Sanskom Mostu pošto je opće poznato da iz prethodnog perioda postoje određene obaveze prema dobavljačima i određena dugovanja pa zbog toga pokrećem inicijativu da se pokuša po sličnom uzoru sanirati i ta dugovanja od Opće bolnice u Sanskom Mostu. Druga stvar, nije nikakvo poslaničko pitanje evo jedna digresija nedavno prilikom Dana armije, pa sam malo u priči sa mojim suborcima zatekao se u razgovoru, zamislite gdje ljudi raspravljaju o tome da li Asim Kamber ima stan u Zagrebu ili Dubrovniku. Gledajte o čemu borci moji pričaju. Ja znam da ima stan u sanskom Mostu, ima porodičnu kuću ali i ako ima Asim Kamber je već pet puta izabran kao poslanik. Dva puta u Domu naroda. Kad sve to nagrubo preračunamo to je preko milion maraka. Ja im kažem, uzmite kod Asima Kambera mog uvaženog kolege niko nema da nije zaposlen. Radi on, supruga, sin, snaha, brat i od brata snaha. Pogledajte o čemu ljudi raspravljaju. Prije svega Asim Kamber je veliki špajmajstor. Kome je on od vas platio kafu, kaže nije nikome. Eto kako čovjek može zalutati u neznanju.

Ekrem Prošić:

Meni je žao što premijer ode i volio bih da se vrati s obzirom da će se pitanje odnositi na njega. Moje prvo pitanje ide ministru MUP-a. Naime, obavješten sam od grupe građana da je ministar prije nekoliko dana viđen u društvu premijera u trgovačkom centru Ljiljan u Cazinu gdje je bilo nekog naguravanja i navlačenja. Budući da je premijer u juednoj od svojih brojni pijanki u nizu na domaćem terenu, ne u Dubrovniku ili Makarskoj, napio se u Bosanskoj Krupi pa onda do Cazina sljedeće destinacije valjda se htjeo kupati u Uni, htjeo skočiti, to sam dobio informaciju. Nakon toga sam dobio informaciju da je viđen u Trgovačkom centru Ljiljan zajedno sa svojim pomoćnikom za finansije i ministrom gdje su imali žustru raspravu čak neki pričaju da je tu htio izvršiti svoj vrsan harikiri da je htio skočiti sa terase na trgovačkom centru, ne znam da li je to istina. A drugo pitanje postavljam ministru zdravstva jer je i on tu noć bio prisutan u društvu premijera pa bih želoi da mi kaže kakvog je mentalnog zdravlja naš premijer jer je isti ministar meni znao u ranijem periodu često reći da premijer ima psihičkih problema, da troši velike količine tableta pa sam ja zabrinut za njegovo zdravlje iako on nije bio za moje kad sam ležao operisan u šok sobi, dok je on obilazio sa svojim mentorima kanton i pričao loše o meni. Kad je vidio da ću preživjeti onda me je na kraju isključio iz SDP-a da se mene na taj način riješi. Ja ne želim da se riješim na takav način našeg premijera koji ima zdravstvenih problema i bilo bi dobro da se podvrgne liječenju, a ja sam između ostalog zabrinut za naš kanton u kojem pravcu njega vodi ovaj premijer.

## ODGOVORI NA POSLANIČKA PITANJA

Ministar MUP-a :

Ja ću kratko jer ima ovdje nekoliko upita. Prije svega ja ću se osvrnuti na pitanje udarnih rupa, jer smo mi u MUP-u zato što građani očito nemaju prave informacije o odgovornosti i ko je odgovoran za nastale štete na njihovim vozilima za koje uredno plaćaju ne male pristojbe za registraciju vozila. Sljedeće da informiram njih i poslanike koji to eventualno ne znaju. Javne ustanove su pravne osobe i shodno tome i snose odgovornost za sve nastale štete koje vozila imaju prilikom korištenja. Ako je u pitanju općinski nivo onda je općinski fond, ako je u pitanju regionalna cesta onda je kantonalna direkcija za ceste i ako je u pitanju federalni nivo onda je federalna direkcija za ceste. Građane koji budu imali oštećenja na vozilima imaju pravo i da pozovu policiju, saobraćajna policija će izići, sačiniti zapisnik a njihova osiguravajuća kuća će namiriti štetu a naplatiti od onih koji su za to odgovorni. Temeljem toga želim da naglasim da policija sa tim nema ništa kao što mnogi mješaju stvari pa misle da je policija odgovorna i za znakove koji se postavljaju a policija nije ni za to odgovorna. Ona je odgovorna da se poštuju znakovi koji se postavljaju a znase dobro da opet ove javne ustanove su nadležne i za postavljanje saobraćajnih znakova.

Odgovoriću kratko svom uvaženom prijatelju Ekremu Prošiću na ovo što je sad rekao. Ja vjerujem da postoji politički animozitet ili potreba da se ova govornica iskoristi da se pošalje slika o nekom ili o nečem što bi umanjilo ili uvećalo o nekom sliku. Ja sam to veče došao u taj restoran i to nije sporno. Nije ni sporno što sam došao jer sam imao i potrebu da dođem i želim da kažem da nije bilo nikakvog navlačenja a da sam određeni razgovor imao sa premijerom to nije sporno. On nije imao nikakav karakter koji bi stvorio između njega i mene bilo kakav eksces ili bilo šta slično ali sam smatrao da kao ministar MUP-a treba da obratim pažnju na sviju tako bih obratio pažnju i na poslanika kad bih ocjenio da je potrebno da možda dođe. Za mog boravka unutra osim jednog pića nije bilo posebno ništa. Ja vam to garantujem. Nakon toga da li je šta bilo ja to ne znam.

Ministar poljoprivrede, vodoprivrede i šumarstva:

Naime, ministarstvu poljoprivrede danas su postavljena dva poslanička pitanja. Na pitanje gospodina Faruka Hodžića ja ću se potruditi da odgovorim kratko i konkretno. Dok na pitanje gospodina Ivana Prše pošto je malo obimnije potrudicu se da dostavim u pisanoj formi. Naime, ugovor o djelu koji je potpisan sa komisijom za odabir visoko mliječnih grla u Njemačkoj, Austriji i Češkoj sa gospodom koju je poslanik već ovdje predstavio je povučen na doradu od strane bivšeg ministra gospodina Galijaševića. U šestom mjesecu isti ugovor je mene dočekaao s ciljem da se čeka da se otvori podračun u banci sa kojeg bi mogli svi biti isplaćeni. Međutim, uvidom u svu dokumentaciju koja je dostupna ministarstvu isti nisu imenovani od strane Vlade ni ministarstva kao komisija. Nemaju putni nalog za odlazak na put u Austriju, Češku ni u Njemačku. Ugovori za vrijeme Galijaševića povučeni su na doradu i nikad nisu dati, a ako idemo na put ne smijemo po pravilu ni ići bez ugovora. I znači ugovori nisu knjiženi u 2012. godini. Znači sve što bih ja kao ministar i ministarstvo trenutno odradilo bilo bi retroaktivno. Ja sam istim predložio da to ide na sud. Ja ne vidim mogućnost sa ekipom u ministarstvu koja radi, ugovore su pregledali pravnici, ekonomisti, da mi isplatimo jer nemam zakonski osnov kojim bih se ja pozvao u tom trenutku. Ja se nadam da će gospodin biti zadovoljan odgovorom a gospodinu Ivanu Prši ću odgovoriti.

